

Kesan minat, bakat kanak-kanak pada peringkat awal

IBU bapa perlu mengambil peluang membawa anak masing-masing ke pusat rekreasi atau riadah yang diwujudkan di seluruh negara dalam usaha mengesan minat mereka.

Pensyarah Kanan, Pusat Penyelidikan Psikologi, Universiti Kebangsaan Malaysia, Prof. Dr. Khaidzir Ismail berkata, bakat anak-anak juga dapat diasah lebih awal sekiranya mereka mempunyai kemahiran dalam bidang-bidang tertentu, sekali gus menjadi landasan terbaik untuk menjamin masa hadapan golongan itu.

"Pusat rekreasi go-kart sebagai contohnya, ia bukan sekadar sebuah pusat sukan bermotor bagi mereka

yang ingin mencuba sukan itu bagi mengisi masa lapang pada hujung minggu tetapi ia juga boleh menjadi tempat untuk mengasah bakat kanak-kanak remaja dalam sukan permotoran.

"Jika pendedahan terhadap sesuatu perkara diberikan lebih awal, tidak mustahil golongan itu akan cenderung untuk lebih fokus, sekali gus berusaha bersungguh-sungguh untuk mencapai cita-cita mereka.

"Secara tidak langsung, ia dapat menghindarkan mereka daripada terlibat dalam gejala negatif selain



KHAIDZIR

mampu menjadi modal insan yang akan berbakti kepada negara suatu hari nanti," katanya.

Pakar Psikologi Kanak-Kanak dan Remaja itu turut memberitahu, golongan remaja dan kanak-kanak pada masa ini sentiasa terdorong untuk melakukan sesuatu perkara berbanding hanya mengetahuinya daripada pembacaan atau perkongsian pengalaman orang lain.

Justeru, kewujudan Pusat Simulator Penerbangan Aviax (Aviax) berjaya memberi impak yang positif dalam perkembangan minda kanak-kanak dan remaja dalam konteks

meningkatkan pengetahuan mereka terhadap sistem pesawat serta kerjaya sebagai juruterbang.

"Jika kanak-kanak itu bercita-cita menjadi seorang juruterbang dan telah diberikan pendedahan awal mengenainya dengan menghadiri program-program seperti yang dianjurkan oleh pihak Aviax, saya percaya dia akan berusaha bersungguh-sungguh untuk mencapai keputusan yang cemerlang dalam pelajaran bagi mencapai cita-cita itu.

"Secara tidak langsung, pusat riadah seperti ini menjadi pusat pendidikan luar darjah yang mampu membentuk keperibadian kanak-kanak pada peringkat awal," katanya.